



Reykjavík 10. júlí 2023

## Niðurstöður könnunar- og matsferlis hjá Arion banka hf.

Fjármálaeftirlit Seðlabanka Íslands leggur mat á áhættuþætti í starfsemi fjármála-fyrirtækja í könnunar- og matsferli (e. Supervisory Review and Evaluation Process, SREP) og með hvaða hætti fjármálafyrirtæki meðhöndlar þá í starfseminni, sbr. lög nr. 161/2002 um fjármálafyrirtæki. Hjá þeim fjármálafyrirtækjum sem metin eru kerfislega mikilvæg fer slíkt mat fram árlega.

Í ferlinu er meðal annars lagt mat á viðskiptaáætlun, stjórnarhætti og innra eftirlit, útlána- og samþjöppunarhættu, markaðsáhættu, rekstraráhættu, lausafjár- og fjármögnunarhættu og álagspróf. Við mat á þessum áhættuþáttum er stuðst við Almenn viðmið og aðferðafræði vegna könnunar- og matsferlis hjá fjármálafyrirtækjum (SREP) sem eru byggð á viðmiðunarreglum Evrópsku bankaeftirlitsstofnunarinnar (EBA) um sama efni. Jafnframt er höfð hliðsjón af ýmsum öðrum viðmiðunarreglum.

Könnunar- og matsferlið leiðir til niðurstöðu um það að hve miklu leyti þær ráðstafanir sem hlutaðeigandi fjármálafyrirtæki hefur gripið til vegna áhættuþáttta séu nægjanlegar, hvort stjórnun þess sé traust og hvort eiginfjárgrunnur sé fullnægjandi með hliðsjón af þeim áhættuþáttum sem felast í starfseminni. Á grundvelli könnunar- og matsferlisins hefur fjármálaeftirlitið meðal annars heimild til að mæla fyrir um hærra eiginfjárlutfall en sem nemur hinu 8% lögbundna lágmarki, endurbætur á innri ferlum, niðurfærslu á eignum við útreikning á eiginfjárgrunni, hömlur eða takmörkun á starfsemi hlutaðeigandi fjármálafyrirtækis og að dregið sé úr áhættu sem starfsemi þess felur í sér. Þá getur fjármálaeftirlitið komið ýmsum athugasemdum og ábendingum á framfæri í ferlinu.

Arion banki hf. skilaði fjármálaeftirlitinu mati sínu á eiginfjárbörf, miðað við 31. desember 2022, með svokallaðri ICAAP/ILAAP-skýrslu í mars 2023. Í kjölfar móttöku skýrslunnar hófst fjármálaeftirlitið handa við að kanna efni hennar og greina upplýsingar sem þar komu fram og afla frekari upplýsinga auk þess sem byrjað var að leggja mat á helstu áhættuþætti í starfsemi bankans. Fjármálaeftirlitið sendi bankanum drög að niðurstöðum könnunar- og matsferlisins í byrjun júní 2023 og fékk bankinn tækifæri til að koma á framfæri andmælum, sbr. IV. kafla stjórnsýslulaga nr. 37/1993. Andmæli bankans bárust síðar sama mánaðar. Fjármálaeftirlitið hefur nú lokið þeim þætti könnunar- og matsferlisins sem snýr að mati á eiginfjárbörf og sendi Arion banka hf. bréf um niðurstöðuna í júnílok 2023.

## Viðbótarkrafa um eiginfjárgrunn Arion banka hf.

Niðurstaðan var að Arion banki hf. skyldi frá og með 30. júní 2023 viðhalda viðbótarkröfu um eiginfjárgrunn sem nemur 2,1% af áhættugrunni (stoð II-R). Viðbótarkrafan kemur til vegna útlána-, mótaðila- og samþjöppunaráhættu, markaðs- og fastvaxtaáhættu og annarrar áhættu sem ekki var nægjanlega tekið tillit til við útreikning á grunnkröfum um eiginfjárgrunn (stoð I). Viðbótarkrafan skiptist þannig að almennt eigið fé þáttar 1 skal nema að lágmarki 1,2% af áhættugrunni og þáttur 1 í heild skal nema að lágmarki 1,6% af áhættugrunni.

Viðbótareiginfjárkrafan kemur til viðbótar grunnkröfum um eiginfjárgrunn og samanlagðri kröfum um eiginfjárauka:

- Grunnkrafa um eiginfjárgrunn (stoð I) nemur 8% af áhættugrunni. Af kröfunni skal almennt eigið fé þáttar 1 nema að lágmarki 4,5% af áhættugrunni og þáttur 1 í heild skal nema að lágmarki 6% af áhættugrunni.
- Samanlögð krafa um eiginfjárauka nemur 9,3% af áhættugrunni og skal henni vera að fullu mætt með almennu eigin fé þáttar 1. Samanlögð krafa um eiginfjárauka tekur mið af samsetningu innlendra og erlendra áhættuveginna eigna, sem er ólík á milli banka.

Miðað við hækjun sveiflujöfnunaráuks 16. mars 2024 verður hin samanlagða krafa um eiginfjárauka að öllu óbreyttu 9,7%. Mælist fjármálaeftirlitið til þess að bankinn viðhaldi eigin fé í samræmi við fyrirhugaða hækjun sveiflujöfnunaráuks.

Heildarkrafa um eiginfjárgrunn Arion banka hf., á samstæðugrunni, nemur því 19,4% af áhættugrunni og samanstendur af grunnkröfum um eiginfjárgrunn, viðbótarkröfum um eiginfjárgrunn og samanlagðri kröfum um eiginfjárauka.